

# Persatuan penjaja Melayu sokong kepemimpinan PM

ALOR STAR, Rabu — Persatuan Penjaja dan Peniaga Kecil Melayu Malaysia Cawangan Kedah menyokong penuh kepemimpinan Perdana Menteri, Datuk Seri Dr Mahathir Mohamad dan Encik Ghafar Baba dalam kerajaan dan parti.

Yang Dipertuanya, Encik Ayub Haji Saad, berkata Perdana Menteri dan timbalannya sentiasa berusaha meningkatkan taraf hidup dan ekonomi penjaja dan peniaga kecil Bumiputera.

Beliau berkata, penjaja dan peniaga kecil di negeri ini juga menyokong Perdana Menteri mempertahankan jawatan Presiden Umno dan Encik Ghafar bertanding Timbalan Presiden Umno dalam perhimpunan agung parti 24 April ini.

Encik Ayub, yang juga Pengerusi Jawatankuasa Gabungan Persatuan Penjaja dan Peniaga Kecil Melayu Malaysia, yakin Perdana Menteri dan Encik Ghafar akan memenangi pemilihan itu.

"Dalam lawatan ke Perak, Selangor, Negeri Sembilan dan Johor,

minggu lalu, kebanyakan ahli gabungan menyatakan sokongan padu mereka kepada Datuk Seri Dr Mahathir dan Encik Ghafar," katanya.

Encik Ayub berkata, gabungan persatuan itu, yang mempunyai 300,000 ahli di seluruh negara, memberi gelaran 'Bapa Pembangunan Penjaja' kepada Encik Ghafar di majlis makan malam anjuran gabungan itu di Kuala Lumpur, 4 April lalu.

Katanya, majlis itu juga dihadiri oleh Datuk Seri Dr Mahathir yang menerima sokongan penuh gabungan itu.

Menurutnya, Encik Ghafar yang menjadi Pengerusi Kompleks Kawangan Malaysia menyediakan bantuan \$50,000 setahun bagi membiayai pentadbiran gabungan itu.

"Kita menganggap sumbangan Perdana Menteri dan timbalannya terlalu besar dalam usaha memajukan penjaja dan peniaga kecil Bumiputera bagi mencapai matlamat Dasar Ekonomi Baru (DEB)," katanya.